

Date – 03/10/2025

Time - 07:30 -07:40Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Kumin Thingtam vanga sazu puang chuan Mizoram district 11-a khaw 122 a chhungkaw 3,983 thlawhhma a buh leh thlai dang a tichhe nasa hle.
2. Saitual district Sihfa ramah tunhnai khan Thangnang a puang .
3. India leh China chuan direct-a khualzin thlawhna thlawh tawn tir chhonzawm an rel.
4. Chhatisgarh-a Bijapur district ah Maoist hel mi 103 sipaite kutah an inpe.

<><><>

RODENT OUTBREAK

Kumin Thingtam lo thleng a, rawthing tam vanga sazu puang chuan Mizoram district 11-a khaw 122 a chhungkaw 3,983 thlawhhma a buh leh thlai dang a tichhe nasa hle.

Agriculture & Farmers' Welfare director Pu R. Lalnunzira'n Akashvani Aizawl a hrilh danin Mizoram puma buh leh thlai chinna hmun hectare 6,869 point 954 a hectare 1,737 point 354-ah sazu puang hi an che a. Buhpui leh thar rang bakah buhban hmunte an tichhia-in buh an ei nasa a, chu bakah thlai dang - vaimim, fu, behlawi, sawhthin, chhawhchhi, hmarcha, mai, bawkbawn leh fanghma thlengin an ei a ni. Sazu puanna hmuna District Agriculture Officer (DAO)-te chuan an bial theuhah sazu thahna hlo/tur bromadiolone leh zinc phosphide an sem a, loneitute hnenah tur hmanga sazu hrai dan an zirtir a. Chu bakah Mizovin tun hma atanga sazu manna atana an thang hman thin 'vaithang', 'mangkhawng' leh 'thangchep' te hmang uar turin an chah bawk a ni, a ti.

Loneitute chu thang an hmanin a ngai reng hmang lova sazu-in thang a ni tih an hriat chhuah hun awm vela hman thlakthleng thin turin zirtir an ni bawk a. Sazu tur hmanga sazu hrai hi awmze nei zawka kalpui a nih theih na'n khaw hrang hrang VC-te chu thlawhhma zau hrang hrangah sazu hrai beihpui thlak thin turin thu an rawn a. Agriculture & Farmers' Welfare department hnathawkte chuan sazu hraina tur leina atana pawisa a tam tawh lo chu an harsatna pakhat a nih thu an sawi a. Sazu puanna khaw thenkhat chu tlawhpawh hleih theih loh leh fur avanga kawng ping tam tak a awm bawh avangin harsatna an tawh tih an sawi a. Khaw thenkhat chuan an bialtute an hrilh tlai lutuk avangin sazu hrai hma a an thlawhhma a seh zawh sakte pawh an awm niin an sawi a ni.

District zingah chuan Serchhip district a khaw 16-a loneitu 1,084 zetin Thingtam hi an tuar a. Mamit district-ah chuan khaw awm zawng zawng 45 thlawhhma-ah sazu a puang a, chhungkaw 769-in an tuar a. Aizawl district a khaw 14-ah chhungkaw 561 in an tuar bawk.

<><><>

OPERATION JERICO

Mizoram sorkarin ruihhlo tawlh leh ruihhlo ngaite laka beihpui a thlak mek lai-in ruihhlo thahnem tham tak man zui zel a ni.

Home Minister Pu K. Sapdanga kaihhruaina hnuaia Police, Excise & Narcotics department leh Central YMA te'n 'Jeriko Beihpui' (Operation Jericho) hming vuaha ruihhlo tawh leh ruihhlo ngaite laka mipui mimir himna atana beihpui an thlak mek lai-in an insawrbingna ber Champhai district-ah ruihhlo thahnem tak man reng a la ni a. He beihpui hi September ni 1 atanga thlak tanin December ni 31 thleng kalpui tura ruahman a ni a. IGP Pu H. Ramthlenglana hovin Central YMA hruaitute chuan Champhai district a Myanmar ramri hrula ruihhlo tawlhute'n luhka atana an hmante chu a bul hnai khua a YMA branch hruaitute nen an fang a. Khawtlang leh YMA hruaitute nen inkawmin beihpui thlakna a thawhho dan turte an rel a. Excise & Narcotics department a thawkte chu mipui mimir tana harsatna siam thei ruihhlo ngaite zalen lutuka khawlai a an chet lohna turin a tul anga khawm tura ruat an ni bawk.

September thla chhung khan Champhai district bikah Champhai District Police-ten Narcotic Drugs & Psychotropic Substances Act, 1985 hnuaiah ruihhlo kaihhnawiha in hnam hnawih mi 25 manin, thubuai 19 an ziaklut a. September thla chhung hian heroin kg 3 leh gram 282, methamphetamine kg 74 leh gram 852, Alprazolam kg 4 leh gram 470, codein gram 1 point 6 bakah ruihhlo phurh nana hman lirthei ke li nei pahnih leh lirthei ke pahnih nei pahnih man a ni bawk. Ruihhlo man zawng zawng hlut zawng hi cheng vaibelchhe 11 leh nuai 66 chuang hu a ni.

Hemi hun chhung vek hian Champhai district Excise & Narcotics hnathawkte chuan ND&PS Act, 1985 hnuaiah ruihhlo kaihhnawiha in hnam hnawih mi 10 manin thubuai 8 an zia lut a. Heroin kg 2 leh gram 772, methamphetamine kg 42 leh gram 88 leh Ganja gram 29 point 9 leh ruihhlo phurh nana hman lirthei ke hnih nei pahnih an man bawk a ni.

<><><>

GANDHI JAYANTI

India hnampa Mahatma Gandhi pianchamphaphak vawi 156-na, Gandhi Jayanti pualin nimin tuk khan Larsap General (Dr) Vijay Kumar Singh (Retd) leh Mizoram Sawrkara mi pawimawh dangten zahna an lantir.

Nimin tuk dar 7:30 a Gandhi Jayanti pual a PUC Campus, College Venga Mahatma Gandhi lima pangpar dah a, zahna lantir zingah hian Acting Chief Minister Pu Vanlalhlana, Mizoram Legislative Assembly Speaker Pu Lalbiakzama, Environment, Forest & Climate Change Minister Pu Lalthansanga leh Health & Family Welfare Minister Pi Lalrinpuii te bakah Chief Secretary Pu Khilli Ram Meena, DGP Pu Sharad Agarwal leh Sawrkar hotulu dangte an tel a. Hun hman zawh hian Larsap leh official-te chuan Pu Gandhi-a ngaihpawimawh faina leh vantlang rawngbawlna lantir nan Swachhata hi Seva pualin tual an phiat fai a ni.

Aizawl veng hrang hranga local council leh YMA branch-te huaihawtin veng chhung thenfai hnatlang an thawk a. Khaw chhe karah mi thahnem tak hnatlangin an thawk chhuak a ni.

Faina leh bawlhhlawh a bawma paih inzirtirnan Sports Authority of India SAI chuan nimin khan Fit India Freedom Run 6.0 a huaihawt a, Aizawla SAI Training Centre atangin Commonwealth Championshop 2023-a Bronze Medalist Lalchhanhimin a vailiam.

Infiammi, coach leh SAI-a thawk mi 100 rual vel an tlan a, Aizawl Mission Vengthlang atanga Treasury Square thleng tlanin, an let leh a ni.

SAI Regional Director Pu Lianhmingthanga chuan an auhla chu –Swachhata Se Swasthya Kir otr- Towards Good Health Through Cleanliness tih a nih thu a sawi a, Hriselna tha nei tura Faina Ngaihpawimawh tih a ni.

<><><>

UDONGA MONTANA

Saitual district Sihfa ramah tunhnai khan Thangnang a puang chiam a, Thangnang puang hi Mizo pi leh pu te chuan Tam hmahruai niin an sawi bawk thin.

Tuna Sihfa rama Thangnang kai hi September 29 (Thawhtanni) khan an hmu tan a, Sihfa khaw chhuah lam Km 1 vela hla Chul zau ram an tih chu bawhin vawiin thleng pawhin Thangnangin a bawh thing leh maute chu a la kur nghek nghuk a, thingzarin a dawl loh hmun thenkhatah chuan a zarin a tliahpuite pawh an awm. Mita hmu tute chuan Thangnang kaina hnuhma leh kalkawng chu thlipui nuai ang maiin a pe sul niin an sawi bawk.

Thangnang hi khawng tawk an awm a, mi pakhatin kg 5 te an khawng hman a ni.

<><><>

GST REFORMS

GST 2.0 rate thar hnuaia thil lei tute'n a man tlawma an lei thei ta chu lawmawm an tih thu an sawi.

Akashvani Aizawl-in thil leitu mi hrang hrang a kawm kualte chuan September ni 22 atanga sorkar laipuiin GST rate thar hmang tura a tih angin a man tlawm a an lei thei ta chuan senso tam tak a chhawk zangkhai a, lawmawm an tih thu an sawi a, September ni 27-a Honda BigWing atanga CB350RS leitu Dawnga chuan GST rate tihdanglam hma aiin cheng sing 2 bawr velin a lei tlawm thei chu lawmawm a tih thu a sawi.

Pi Tetei pawhin GST rate thar hman hnua Aizawla damdawi dawr thenkhat atanga a lei, paracetamol, pum damdawi leh zunthlum damdawi te chu a man pangngai atanga zaa 7 a tlawmin a lei a ti a, natna benvawn zunthlum leh BP sang nei, engtiklai pawha damdawi ei reng ngaite tan phei chuan a lawmawm hle a a hriat thu a sawi.

Nitin mamawh leitu Sangsangi chuan bawnghnute cheng 84-a a lei thin chu GST rate thar hnuaiah cheng 80 in a lei a, Lifebuoy sahbon cheng 120-a a lei thin chu cheng 100 in a lei a, chocolate cheng 200-a a lei thin chu cheng 170-in a lei a, India siam nihawichi leh chips te pawh a hma aia man tlawmin a lei a, nitin

mamawh hrang hrang a lei belkhawm hi a man pangngai aiin cheng 80 velin a tlawm a, lawmawm a ti hle tih a sawi.

Hetihlai hian dawrkai thenkhatte chuan an bungrua te chu GST rate tihdanglam hmaa an lak te a nih avangin a man ngaiin an la hralh chhuak tih an sawi a, GST 2.0 hnuaiah mihring hriselna atana tha lo, Sin Good ti-a sawi vaihhlo leh a kaihhnawih atanga thil siam te chu zaa 40-ah tihpun ni tawh mah se, a man pangngaia la zawrh chhuah a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

INDIA CHINA FLIGHT

India leh China chuan direct-a khualzin thlawhna thlawh tawn tir chhonzawm an rel. Tun thla tawpah heng ram pahnih inkalpawhna tur thlawhna te hi thlawh tan tir beisei a ni a. External Affairs Ministry sawidanin ram pahnih civil aviation lam hotute an indawr mek a, Air Service Agreement angin India leh China inkara thlawhna thlawk tur hi tih fel a ni ang.

<><><>

MAOIST

Chhatisgarh-a Bijapur district ah Maoist hel mi 103 sipaite kutah an inpe a. Hel inpe zingah hian hmeichhia 23 an tel. Sipaite sawidanin hel inpe zinga 49 te hi an luman belhkhawm chu vaibelchhe 1 leh nuai ruk chuang a ni a. State sawrkarin indinthar lehna tur policy a ruahman hmangin Maoist hel inpete chi cheng sing nga theuh pek phawt an ni a. Kuminah Bijapur district ah hian Maoist hle 410 ten nunphung pangngai zawm turin sawrkar kutah an inpe tawh a ni.

<><><>

GST

National Consumer Helpline chuan GST 2.0 hman anih hnua tum sang thum chuang mipuiten GST chungchangah an rawn biak tawh thu an saiw. Union Ministry of Consumer Affairs, Food and Public Distribution sawidanin heng rawn be tute zinga zaa31 hian GST chungchang an zawtfiah a. Zaa 69 chu lungawilohna rawn thlen an nih thu a sawi.

<><><>